

Vorrede.

ängstiger/ihnen so viel treffentliche Schlachten ab gewonnen/ein solche grosse Menge der Römischen Bürger erschlagen/ ja gar zu den Statt Thoren hinein gejaget/ dergleichen ihnen/ vnder allen ihren Feinden keiner nie gethan/ ihnen auch dermassen keiner mehr zugesetzt/noch mehr Victorias wider sie gehabt/ als eben diser Annibal/ Das hat er aber auch durch kein anderes Mittel zuwegen gebracht/ als eben durch sein Geschwindigkeit vnd Aphricanische Manier zu streiten/ vnd hat sich offtermals begeben/ wann die Römer vermainet/ er were am aller weitesten von ihnen/ so ist er ihnen gleich auff dem Hals gewesen/ also auch herwiderumb/ wann sie gemainet/ er were am nechsten bey ihnen/ so ist er am weitesten von ihnen gewesen: Dann die Römer haben gar schwere Rüstungen gebraucht/ seynd in ihrer Ordnung geblieben/ darauß nicht schreiten dürffen/ hergegen aber hat sie das Aphricanische Kriegsvolk auff allen seiten (wie dann der Numidarum Gebrauch/ davon auch Salustius de bello Iugurthino schreibet) angegriffen/ jetzt vornen/ bald hinten/ jetzt auff einer/ bald auff einer andern seitten/ ainen da/ den andern dort nider gestochen/ vnd solliches so lang getrieben/ bis sie die Römer mit ihrer Aphricanischen Geschwindigkeit müde gemachet/ vnd so sie alsdann ihre Gelegenheit ersahen/ mit allem Gewalt auff allen Seitten zugleich in sie gefallen/ ernider geschlagen vnd gestochen/ was sie gemocht/ im fall aber das sie ihnen nicht getrauwet haben/ ainen sollichen Vberfall zuthun/ oder das ihnen die Römer vberlegen/ so haben sie sich nicht lang gesäumet/ sondern bald darvon gelauffen/ die Römer stehen lassen/ die haben in ihren schweren Rüstungen nicht mögen hinch nach kommen/ vnd so sie inen schon nachgehenge/ so haben sie doch den Römern viel mehr Schaden gethan in der Flucht als in der Schlacht/ gleich natürlich wie vns jekunder die laidigen Türcken thun.

Nach dem aber die Römer so offte geschlagen worden/ haben sie doch zu letzt auch gemercket/ waran es ihnen gefehlet/ haben alsbald ihr Kriegswesen verändert/ vnd ringere Rüstung angethan/ alsdann seynd sie dem Annibali nicht allein obgelegen/ sondern auch auß ganz Italia geschlagen/ vnd daran auch nicht benügen lassen/ sondern ihme gar in Hispaniam vnd ober Meer in Aphricam nachgefolget/ inne allda geschlagen/ seine beste Stete Numantium vnd Carthaginem zerstöret vnd zerrissen/ das kein Stein auff dem andern geblieben.

Dieses alles vermeldet ich aber auß keiner andern vrsache/ dann allain/ das man außgenscheinlich darauß sehen solle/ wie viel an der Rosszucht gelegen sey (welliche nicht viel dieser zeit geachtet wird/ sondern es machet ihm ein jeglicher seine Rechnung/ wann er eines Ross bedarffe/wölle er es vmb das Geld wol bekommen) das man nemlich dahin solle dencken vnd trachten/ das man gute/ringe/ aber doch starcke Kriegssross vnd solche ziehe/welliche man wider diesen vnseren Erbfeinde den Türcken gebrauchen möge/ dann es tauzen nicht alle Ross darzu: Es wird mir einer auff einem Friesischen oder Niderländischen Hengste/ ja auch auff vnseren Teutschen Kleppern/ auff den Bngerischen Handen kainen Türcken erreiten/ vnd noch viel minder auff einem Gosi erfahren/ das mag er wol für gewiß halten: Wann man aber wird Ross ziehen auff diese Manier vnd Art/ wie in diesem meinem Büchlein vermeldet wirdt/ so wil ich ainen wol vergewissen/ das er auch einem Türcken/welcher nun wol beritten/ gleich so bald würde mögen auff der Hauben seyn/ als der Türck ihme/ vnd würd gewißlich ihme nicht also entreiten/ wie etwan jekund geschicht.

Ich kan aber wol erachten/ das ich nit darzu geweiht/ sondern viel zu ringfertig bin/ eine solche wichtige Sach durch disse mein Büchlin in das Werck zubringen/ Das man sich nemlich in gemein vberal auff dergleichen Rosszucht begeben/ es gehöret vil ein mehrers darzu/ nemlich eine allgemeine vergleichung aller Teutschen Potentaten/ das ein jedweder in seinem Land durchauß dergleichen Ordnung fürnemme/welches gleichsam ein vnmöglich ding: Ich habe es auch/ die warhait zusagen/ nit darumb geschrieben/ vmb vil Resformationes vñ Ordnungen zumachen/ oder sonst für grosse Herrn vnd Potentaten/ welche selbst Leut haben/ so dieser Sachen verständiger sind als ich/ sondern für meine Kurzs

weiß